

ACTA DA SESIÓN EXTRAORDINARIA DO CONCELLO PLENO DO 26.10.2017

No salón de sesións da Casa Consistorial do Concello de Fene (A Coruña), cando son as 12.00 h do 26.10.2017, reúnese o Pleno do Concello aos efectos de celebrar, en acto público, a sesión extraordinaria que ten por Orde do día a aprobación, se procede, da Moción de censura proposta contra o Sr. Alcalde Juventino José Trigo Rey.

Asistiron os/as concelleiros/as:

Gumersindo Pedro Galego Feal, Rocío Aurora Bértoa Puente, Juan José Franco Casal, Alejandro Jorge Gutiérrez Sánchez, Juana Barro Couto, José Andrés Serantes Panceiras, Ana María Novo Picos, Juventino José Trigo Rey, Alejandra Permuy Meizoso, Justo Martínez Ardá, María Manuela Aguilar Prieto, Antón Lois Noceda Carballo, Joaquín Julián Ayala Garrido, Amalia García Balado, Xoán Manuel Rodríguez Bastida, César Daniel Castro García e María del Carmen Martínez Rodríguez.

Secretaria accidental:

Carmen López Villar

Interventora:

Iria Luisa Díaz Gavela

A presente sesión celébrase en cumprimento do artigo 197 da Lei Orgánica 5/1985, de 19 de xuño, de Réxime Electoral Xeral. A secretaria accidental toma a palabra e di o seguinte:

Bos días.

Ante a presentación, con data 11 de outubro de 2017 (R.E. núm. 7.717), da "Moción de Censura" contra o actual alcalde-presidente do Concello de Fene, Juventino José Trigo Rey, polos/polas Señores Concelleiros/as dos grupos municipais do Partido Popular e Somos Fene, quedou automaticamente convocada a sesión extraordinaria de Pleno para o día de hoxe, xoves 26 de outubro de 2017.

Con carácter previo ao tratamento da referida cuestión, cabe sinalar que obra no expediente Informe de Secretaría de data 26.10.2017 do seguinte tenor literal:

"Tendo en conta que o artigo 173.1.b) do Real Decreto 2568/1986, do 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais, establece a necesidade de informe previo do Secretario para adopción de acordos sempre que se trate de asuntos sobre materias para as que se esixa unha maioría especial, eu, Carmen López Villar, secretaria accidental deste Concello, teño a ben emitir o seguinte

INFORME DE SECRETARÍA

A lexislación aplicable para o desenrolo da sesión atópase regulada, principalmente, no artigo 197 da Lei Orgánica 5/1985, do 19 de xuño, do Réxime Electoral Xeral, cuxo punto 1 é do seguinte tenor literal:

"1.- El Alcalde puede ser destituido mediante moción de censura, cuya presentación, tramitación y votación, se regirá por las siguientes normas:

a) La moción de censura deberá ser propuesta, al menos, por la mayoría absoluta del número legal de miembros de la Corporación y habrá de incluir un candidato a la Alcaldía, pudiendo serlo cualquier Concejal cuya aceptación expresa conste en el escrito de proposición de la moción.

En el caso de que alguno de los proponentes de la moción de censura formara o haya formado parte del grupo político municipal al que pertenece el Alcalde cuya censura se propone, la mayoría exigida en el párrafo anterior ser verá incrementada en el mismo número de concejales que se encuentren en tales circunstancias.

Este mismo supuesto será de aplicación cuando alguno de los concejales proponentes de la moción haya dejado de pertenecer, por cualquier causa, al grupo político municipal al que se adscribió al inicio de su mandato.

b) El escrito en el que se proponga la moción de censura deberá incluir las firmas debidamente autenticadas por Notario o por el Secretario general de la Corporación y deberá presentarse ante éste por cualquiera de sus firmantes. El Secretario general comprobará que la moción de censura reúne los requisitos exigidos en este artículo y extenderá en el mismo acto la correspondiente diligencia acreditativa.

c) El documento así diligenciado se presentará en el Registro General de la Corporación por cualquiera de los firmantes de la moción, quedando el Pleno automáticamente convocado para las doce horas del décimo día hábil siguiente al de su registro. El Secretario de la Corporación deberá remitir notificación indicativa de tal circunstancia a todos los miembros de la misma en el plazo máximo de un día, a contar desde la presentación del documento en el Registro, a los efectos de su asistencia a la sesión, especificando la fecha y hora de la misma.

d) El Pleno será presidido por una Mesa de edad, integrada por los concejales de mayor y menor edad de los presentes, excluidos el Alcalde y el candidato a la Alcaldía, actuando como Secretario el que lo sea de la Corporación, quien acreditará tal circunstancia.

e) La Mesa se limitará a dar lectura a la moción de censura, constatando para poder seguir con su tramitación que en ese mismo momento se mantienen los requisitos exigidos en los tres párrafos del apartado a), dando la palabra, en su caso, durante un breve tiempo, si estuvieren presentes, al candidato a la Alcaldía, al Alcalde y a los Portavoces de los grupos municipales, y a someter a votación la moción de censura”.

O pasado día 11 de outubro presentouse ante mín, secretaria accidental, unha moción de censura ao actual alcalde Juventino José Trigo Rey, a cal dilixenciei indicando o seguinte:

“DILIXENCIA: Que estendo eu, Carmen López Villar, en calidade de secretaria accidental do Concello de Fene, en cumprimento do disposto no artigo 197 da Lei 5/1985, de 19 de xuño, do Réxime Electoral Xeral, para facer constar que a presente moción de censura foi presentada por Gumersindo Pedro Galego Feal o día 11.10.2017 reunindo os requisitos esixidos no mencionado artigo.

Non obstante, advírtese a existencia do Auto 00069/2017 do Xulgado Contencioso-Administrativo Nº1 de Ferrol, polo que se acorda estimar a solicitude de medidas cautelares fronte ao acordo do Pleno do Concello de Fene de data 03.08.2017, que en caso de ser revocadas, deixarían sen efecto a presente Dilixencia.”

O escrito así dilixenciado foi rexistrado co R.E. núm. 7.717 o mesmo día, e tal e como sinala o artigo 197 da Lei Orgánica de Réxime Electoral Xeral, o Pleno quedou automáticamente convocado para as doce horas do décimo día hábil seguinte ao do seu rexistro, debendo o secretario da Corporación remitir notificación indicativa de tal circunstancia a todos os membros da mesma no prazo máximo dun día, a contar dende a presentación do documento no Rexistro, aos efectos da súa asistencia á sesión, especificando data e hora da mesma. Todos estes trámites foron cumpridos e así consta no expediente.

Dentro das funcións da Mesa de idade atópase dar lectura á moción, e a comprobación de que se manteñen os requisitos esixidos nos tres parágrafos do apartado a) do artigo 197 da LOREX.

A cuestión radica en examinar as circunstancias que poderían ter variado os requisitos, dende a presentación da moción ata a votación.

C.I.
F:
P-
150
360
0-G

En principio, a sesión plenaria, salvo comunicación de auto ou resolución xudicial emitida por Xulgado competente, debería celebrarse, se ben recaea na Mesa de idade, verificar que se manteñen os requisitos.

En relación con elo, segundo informe emitido ás 10:00 horas do día de hoxe por Ana María Santano Martínez, administrativa do Concello de Fene, encargada do Rexistro Xeral de Entrada de documentos, resulta que no prazo comprendido entre o día 11.10.207 e as 10:00 h do 26.10.2017, constan os seguintes escritos remitidos por un órgano xudicial, en relación a este expediente:

-Auto do Xulgado Contencioso-Administrativo Nº 1 de Ferrol (R.E. núm. 7949), comunicando a denegación da medida cautelar urxente solicitada en representación de D. Juventino Trigo Rey no Procedemento: PMU PIEZA DE MEDIDAS CAUTELARISIMAS 0000212/2017 001.

-Oficio do Xulgado Contencioso-Administrativo Nº 1 de Ferrol (R.E. núm. 7950) solicitando remisión no prazo de 5 días do expediente administrativo referido ao Procedemento: DF Derechos Fundamentais 0000212/2017.

A Mesa de idade ostenta a competencia para decidir continuar coa tramitación da moción de censura ou, no seu caso, levantar a sesión sen que se chegue a producir o debate e votación da mesma.

A decisión que adopte a Mesa estará sometida a control da xurisdición contencioso-administrativa.

No caso de que a Mesa acredite que a moción segue cumprindo os requisitos legais, procederase a dar a palabra, durante un breve tempo, ao candidato á alcaldía, ao alcalde, e aos voceiros dos grupos municipais, e a someter a votación a moción de censura.

A votación, por esixencia do artigo 22.3 da Lei 7/1985, de 2 de abril, reguladora das Bases do Réxime Local, realizarase por chamamento nominal, por orde alfabético de apelidos e, en último lugar, votarán os membros da Mesa de idade.

A Mesa de idade, logo de ver o resultado da votación, se procede, declarará alcalde ao candidato proposto, quen deberá tomar posesión, de conformidade co artigo 40 do RD 2568/1986, do 28 de novembro, polo que se aproba o Regulamento de Organización, Funcionamento e Réxime Xurídico das EELL, na forma establecida para os cargos públicos.

CONCLUSIÓN

A xuízo da que asina este informe, non se observan impedimentos para continuar coa tramitación da sesión, non obstante, a Mesa decidirá o que estime pertinente.

Este é o meu informe, salvo calquera outro mellor fundado en dereito.

En Fene, asinado dixitalmente na marxe pola secretaria accidental Carmen López Villar."

De seguido, a secretaria accidental procede, como marca a lexislación de referencia, a constituir a Mesa de idade, para o que di o seguinte:

"En cumprimento da lexislación exposta, é necesario proceder á constitución da Mesa de idade.

Tras o exame da documentación acreditativa da personalidade dos/das Concelleiros/as, obrante nestas dependencias municipais, a concelleira electa de maior idade resulta ser M^a Manuela Aguilar Prieto, e a de menor idade, Rocío Aurora Bértoa Puente, as cales integrarán a Mesa de idade, actuando como secretaria da mesma, a secretaria accidental do Concello de Fene.

En consecuencia, prego ás mencionadas Concelleiras que tomen asento no lugar correspondente á Presidencia do Pleno, quedando así constituída a Mesa de idade, a fin de dar lectura á moción, e comprobar que se manteñen os requisitos esixidos nos tres parágrafos do apartado a) do artigo 197 da LOREX."

As concelleiras nomeadas sitúanse no lugar correspondente á presidencia do Pleno, quedando constituída a Mesa de idade.

A Sr. Aguilar toma a palabra, saúda, e pide á secretaria da Mesa que proceda á lectura do texto da moción de censura.

A secretaria le textualmente a moción rexistrada:

"D. Gumersindo Pedro Galego Feal, Dona Rocío Aurora Bértoa Puente, Don Juan José Franco Casal, Dona Juana Barro Couto, Don Alejandro Gutiérrez Sánchez e Dona Ana Novo Picos, concelleiros do grupo municipal do Partido Popular no Concello de Fene, Xoán Manuel Rodríguez Bastida e Cesar Daniel Castro García concelleiros de SOMOS FENE, de conformidade co establecido na lexislación vixente presentan esta moción de censura para o seu debate e aprobación polo Pleno do Concello de Fene en base aos seguintes

FEITOS

Celebradas as eleccións locais do 24 de maio do ano 2015, o día 13 de xuño celébrase o pleno constituínte do Concello de Fene.

O artigo 196 da Lei 5/1985 de Réxime Electoral establece que "na mesma sesión de constitución da corporación procédese á elección do Alcalde de acordo co seguinte procedento:

- a) Poden ser candidatos todos os concelleiros que encabecen as correspondentes listas*
- b) Se algún deles obtén a maioría absoluta dos votos cos concelleiros é proclamado electo.*

En dita sesión constitutiva resultou elixido alcalde de Fene o concelleiro, cabeza de lista do BNG, don Juventino Trigo Rey, acadando o voto de nove concelleiros (4 do BNG, 3 do Grupo Municipal Socialista, e 2 de SOMOS FENE) que supoñen a maioría absoluta do Pleno do Concello de Fene. No caso de que non acadara dita maioría absoluta gobernaría a lista máis votada que foi a do Partido Popular de Fene con 7 concelleiros.

Conforme ao exposto, don Juventino Trigo Rey foi elixido legalmente e lexitimamente Alcalde de Fene, constituíndose un goberno de coalición integrado polas tres forzas políticas.

No transcurso do primeiro ano da lexislatura, a falla de diálogo e o sectarismo do Alcalde cos seus socios de goberno culminou o día 9 de agosto de 2016 coa súa decisión unilateral de retirar as competencias aos concelleiros do Grupo Municipal Socialista e SOMOS FENE.

Dende ese momento o Alcalde de Fene, elixido de forma legal e lexítima, pasou a ser un alcalde legal pero ilexítimo, xa que non representa a maioría do pleno. O alcalde que decidiu utilizar a Lei para que o elixiran e, unha vez elixido, utilizou as competencias que a Lei lle confire para retirar e expulsar do goberno a aqueles concelleiros que non eran da súa formación quedando o goberno en minoría co alcalde e tres concelleiros. A utilización da lei para acadar un fin distinto ten un nome claro, fraude de lei. Por tanto, dende o 9 de agosto de 2016 goberna en Fene un alcalde fraudulento que utilizou os votos dos concelleiros para a súa elección e utilizou as competencias que a lei lle confire para a súa premeditada expulsión.

Ese foi o camiño seguido por un alcalde elixido legal e lexitimamente para converterse nun alcalde ilexítimo.

A posterior incorporación dunha concelleira da formación que acadou o menor número de votos non concede ao alcalde ningún plus de lexitimidade. A correlación de forzas hoxe no pleno é radicalmente distinta á do ano 2015. Hoxe somos 12 concelleiros na oposición e 5 no goberno. Dirixen o noso Concello, en votos, a segunda e a última forza política. Transcorrido máis dun ano dende a súa decisión de quedarse só, case nada se fixo.

Dende aquela tamén foi reprobada a súa actitude no pleno en tres ocasións, xa que semella que a decisión que tomou elevoulle o ego de tal maneira que, actuando como se tivera maioría absoluta no pleno, ninguneou e ignorou a oposición de maneira case vergoñenta pleno tras pleno ata hoxe.

Durante estes meses sumáronse diversas reprobacións produto do sectarismo e a intolerancia do Sr. Trigo Rey:

- 1.- Moción de reprobación do Grupo Municipal Socialista pola falta de lexitimidade democrática.*
- 2.- Moción de reprobación e solicitude de dimisión do Partido Popular pola actitude amosada polo Sr. Trigo Rey no pleno ordinario do mes de agosto de 2016, no que pretendeu introducir por vía de urxencia os orzamentos de 2016.*
- 3.- Moción de reprobación e solicitude de dimisión pola perda da subvención do Plan Medioambiental da Deputación provincial de A Coruña (PMA/2016).*

Igualmente, o seu oscurantismo levou á oposición a promover dúas comisións especiais para o estudo dos seguintes feitos:

- Pago irregular do carné de conducir a un funcionario*
- Suposta venda de chatarra sen fiscalización*

Ademais dos feitos que motivaron a presentación e aprobación das tres mocións relacionadas, o incumprimento do pacto de goberno subscrito no ano 2015, nos últimos 14 meses, foi absoluto.

A día de hoxe, pese ás declaracións reiteradas do alcalde no senso de manifestar que votou do goberno ao Grupo Municipal Socialista e a SOMOS FENE por obstaculizar o cumprimento do acordo de goberno e que dende que goberna só está a cumprir o devandito pacto, o certo é que nada fixo dende o 9 de agosto de 2016 para tratar, xa non de acadar, se non achegarse minimamente a algún dos obxectivos marcados. Seguindo os puntos recollidos no mesmo:

PARTICIPACIÓN VECIÑAL, INFORMACIÓN E TRANSPARENCIA

Nin unha soa actuación en 10 meses. Incluso antes de romper o goberno negou ao concelleiro de participación cidadá pertencente a SOMOS FENE a inclusión dunha partida orzamentaria no 2016 para tal fin.

EMPREGO:

Fóra dos convenios anuais ofertados e financiados pola Deputación Provincial de A Coruña para o fomento do emprego nada se fixo. A maiores incluso lle foi denegado un obradoiro de emprego do Plan Reinicia da Xunta de Galicia para formación de xóvenes en busca do primeiro emprego, debido ás deficiencias do proxecto que non chegou a acadar a mínima puntuación.

BENESTAR SOCIAL, DEPENDENCIA E IGUALDADE

Retraso na concesión das axudas de emerxencia social. Negativa a subscribir o Plan da Xunta de aluguer de vivendas baleiras para o caso de malos tratos ou desafiuzamentos. Desaparición do programa de tardes activas e talleres de memoria.

UN CONCELLO SOSTIBLE CON SERVIZOS BÁSICOS UNIVERSAIS

Auga a Magalofes. Nos últimos 14 meses, non se concretou unha soa xestión pese a existir varias ofertas de terreos para os depósitos

Posta en marcha do Punto Limpo. En 14 meses non se ten concretado ningunha actuación que avance nesta cuestión pese á dispoñibilidade dos concellos veciños.

Mellora do alumado público. Non se ten realizado ningunha actuación máis alá das de mero mantemento.

Mantemento de parques. A data de hoxe, o Concello de Fene non dispón de ningún parque certificado segundo marca a normativa vixente. A pesar diso, o actual goberno non ten impulsado ningunha medida de calado nos parques infantís.

Protección do medio ambiente. Máis alá das pirámides de madeira para os escornabois e as charcas artificiais en Marraxón, non se lle coñece ningunha outra innovación. Seguimos con verquidos na ría e varios puntos, etc.

Implementar medidas que melloren a xestión da auga. A pesar de saber que o contrato con Viaqua vence no 2018 non se ten realizado ningunha xestión. Ao contrario, permitiu durante un ano que Viaqua non baleirase de lodos a vella depuradora de Maniños.

Fortalecer a reciclaxe. Non se ten constancia de que implementase ningunha medida.

EDUCACIÓN, CULTURA, LINGUA E DEPORTES

Nin unha soa actuación de relevancia, deixando de atender as necesidades básicas de mantemento de varios centros de ensino.

URBANISMO E VIVENDA

Nin unha soa actuación en dous anos, transcorrendo xa máis de ano e medio dende a entrada en vigor da nova Lei do Solo de Galicia, manifestando expresamente o concelleiro de urbanismo en comisión que non fixera nada.

REDISTRIBUÍNDOS RECURSOS, TAXAS, IMPOSTOS, AXUDAS E BOLSAS

Despois de 14 meses de goberno en solitario seguimos sen orzamentos, sen ordenanzas fiscais, sen revisión do IBI, sen revisión de taxas, sen ampliar bolsas de axudas.

XESTIÓN CON OUTRAS ADMINISTRACIÓNS

Da remunicipalización de rúas da Deputación Provincial de A Coruña, da xestión de beirarrúas nos viais da Deputación, da execución do convenio con ADIF para os pasos elevado e soterrado e da xestión con SEPES da segunda fase de Vilar do Colo non hai constancia de ningún avance.

Noutra orde non se debe olvidar que o responsable do cumprimento dos obxectivos fundamentais dun goberno é o Alcalde. No seu caso dende que tomou posesión nada fixo por solventar numerosas cuestións que afectan á calidade de vida dos veciños e veciñas de Fene:

1.- Plan Xeral de ordenación urbana. A súa revisión e adaptación á Lei do Solo quedou ralentizada na lexislatura anterior ante a inminente aprobación da nova Lei do Solo, lei que foi aprobada polo Parlamento de Galicia no mes de febreiro de 2016. Pasou xa máis dun ano e medio e, en comisión, a preguntas da oposición ao seu concelleiro de urbanismo manifestou literalmente que non fixera nada.

2.- Orzamentos: despois do seu incualificable intento de levar uns orzamentos sen consensuar ao pleno ordinario de agosto de 2016 por vía de urxencia e tratar de forzar a súa aprobación sen consensuar cos seus socios de goberno e sen falar coa oposición, case en cada pleno e en cada comisión de facenda dende o mes de outubro veu manifestando que en breve se trasladarían aos distintos grupos políticos as liñas mestras dos orzamentos. Até a data non se ten presentado unha soa liña, renunciando xa á súa presentación. E a maior abundamento aínda tivo que formular un plan económico financeiro por primeira vez no Concello de Fene.

3.- Ordenanzas municipais: pese á imperiosa necesidade de moitas delas, como a de concesión de axudas de emerxencia, nada fixo.

4.- Punto limpo: que lle vamos a dicir. Na lexislatura anterior votou en contra da proposta do anterior goberno de ceder a súa xestión á mancomunidade. Dende o inicio da lexislatura dixo que de forma inminente poñería en funcionamento o mesmo. Despois de varios anuncios na prensa seguimos sen avanzar un só paso cara a apertura do punto limpo.

5.- Paso elevado e soterrado da vía do tren: en máis de dous anos o alcalde non ten realizado unha soa xestión fructífera nin con ADIF nin cos propietarios/as das parcelas que necesitan ser cedidas para o inicio das obras.

6.- Senda peonil a escola infantil do Carril: ata a data foi incapaz de recoller as cesións dos veciños para o vial. O concelleiro de urbanismo non sabe nin cantas se necesitan nin cantas faltan.

7.- O edificio da antiga cámara agraria: votou en contra da súa adquisición á Xunta de Galicia polo goberno anterior, argumentando que debería ser unha cesión gratuíta. Nin onerosa nin gratuíta. Ningunha xestión en máis de dous anos.

8.- Casa de Cela: ningunha xestión realizada en máis de dous anos.

9.- Plan de aluguer de vivendas baleiras: pese a saber o necesario que é contar con algún inmovible para acoller a persoas maltratadas ou desafiuzadas, o seu concelleiro de urbanismo manifestou en comisión que non fixera nada ni o ía facer.

10.- Plan de medio ambiente da Deputación: perde a subvención por presentala fóra de prazo.

11.- Plan Reinicia: para fomento do primeiro emprego para xóvenes. Foi denegado porque o proxecto presentado é tan inconsistente que non obtén nin a puntuación mínima.

12.- Subvención da Deputación para persoal para a caseta de turismo.- Di que non o solicitou porque era anti-económico para o Concello ao ter que achegar unha parte do custo, e que era mellor contratar unha empresa privada. Nin se leu as bases. Resulta que se lle concedeu a todos os Concellos co gasto subvencionable ao cen por cen.

13.- Renovación da rede de abastecemento na marxe esquerda da Avenida das Pías: proxecto redactado xa polo anterior goberno e incluído nesta lexislatura no PAS do ano 2015. Aínda en licitación.

14.- Aglomerados: en dous anos só se fixo o Camiño do Catalán, 600 metros en Lubián, un tramo da Rúa Río Cádavo e a Rúa Casaredo – Romariz.

15.- Saneamento: só se realizaron a reposición dun pequeno tramo na rúa Xerardo Díaz e outro na rúa Unión. Ningún nos últimos 14 meses de goberno.

16.- Desastre na xestión do baleirado da antiga depuradora de Maniños: pese a que o goberno anterior deixou un proceso iniciado e ratificado por sentenza xudicial, foi incapaz de xestionar o baleirado da instalación durante un ano e de impoñerlle as multas a empresa concesionaria que ordeaba a resolución da alcaldía e a sentenza.

17.- Como colofón abonou a un funcionario os gastos para a obtención do carné de conducir dun camión, saltando os principios de igualdade, mérito e capacidade. O que se debe sumar a admisión de unha instancia fóra de prazo para cubrir unha comisión de servizos que foi anulada pola Xunta a quen, ata a data, non fixo nin caso, etc.

É preciso poñer fin ao sen sentido, sectarismo e nepotismo deste goberno do Sr. Trigo á cabeza e volver á racionalidade e o equilibrio da corporación. É o momento do compromiso porque sería imperdoable deixar que esta situación de desgoberno continúe en detrimento dos servizos aos veciños cando estamos en situación de poder cambiala.

Sendo responsables co mandato recibido nas derradeiras eleccións, os concelleiros que subscriben esta moción de censura asinaron un pacto de goberno público e a disposición da veciñanza no que constan as liñas básicas do seu compromiso, tendo como base o desenvolvemento do documento "Programa de actuación no Concello de Fene 2015-2019" con especificacións concretas nas áreas de gobernabilidade, facenda, obras, persoal, contratación, ética e transparencia e dar continuidade á acción de goberno.

DEREITO

No marco da regulación legal vixente e facendo uso lexítimo das ferramentas democráticas propias dun estado constitucional, os que subscriben esta moción, pertencentes a dous grupos políticos dos que compoñen esta corporación e sumando un total de 9 concelleiros, acordan dan resposta á paralización do Concello cun cambio de xestión e de rumbo.

E de conformidade coa Lei Orgánica 5/1985, de 19 de xuño, de Réxime Electoral, presentamos esta moción de censura contra o alcalde don Juventino José Trigo Rey, concretamente en base ao artigo 197.

A moción de censura a subscriben 9 concelleiros que constitúen a maioría absoluta do número legal de membros da corporación. Os concelleiros que subscriben a moción propoñen a don Gumersindo Pedro Galego Feal como alcalde do Concello de Fene, e a súa aceptación expresa consta no presente escrito de presentación da moción. Esta moción preséntase subscrita polos concelleiros que a encabezan coas súas firmas debidamente autenticadas ante o notario de Pontedeume don Alvar Quintanilla López Tafal. Esta moción preséntase perante a secretaria do Concello de Fene aos efectos de que acredite que a moción cumpre os requisitos establecidos no artigo 197 da Lei Orgánica 5/1985, de 19 de xuño, de Réxime Electoral Xeral.

Polo exposto, solicitamos teña por presentada esta proposición de moción de censura contra o alcalde do Concello de Fene don Juventino José Trigo Rey, se sirva admitila dispoñendo os trámites necesarios para levala a efecto, así mesmo, e de conformidade co artigo 197.1.c da citada Lei 5/1985, de 19 de xuño, de Réxime Electoral Xeral, quedará o Pleno automaticamente convocado para as 12 horas do décimo día hábil seguinte ao seu rexistro."

A secretaria indica que constan as firmas dos propoñentes e a aceptación do candidato a alcalde, que le textualmente:

"Don Gumersindo Pedro Galego Feal, DNI 76404133L, de acordo co establecido no artigo 197.1.a da Lei Orgánica 5/1985 de Réxime Electoral Xeral, acepto de forma expresa a miña designación como candidato á Alcaldía do Concello de Fene."

A Sra. Aguilar toma de novo a palabra e di que antes de continuar con este pleno quere comunicar que dentro das funcións da Mesa de idade está a de comprobar se se cumpren os requisitos esixidos no apartado a) do artigo 197 da LOREX, Lei Orgánica do Réxime Electoral Xeral. Sinala que visto o informe da secretaria e á vista do escrito presentado hoxe polo representante...

A Sra. Bértoa interrompe a intervención da Sr. Aguilar para dicir que antes teñen que falar, mentres esta manifesta que ten a palabra e o voto de calidade, e que lle ofreceu falar antes do pleno. A Sra. Bértoa di que a Mesa de idade ten que decidir e que teñen que falar. A Sra. Aguilar afirma que primeiro lerá o escrito ante o Pleno e logo decidirán. A Sra. Bértoa diríxese á Sra. Aguilar e dille que é unha compoñente da Mesa de idade igual ca ela, e que ten que saber o que quere ler. Engade que non está de acordo coas anotacións da Sra. Aguilar que está a ver. Dille que ten que deixarlle ver o que vai ler, e a Sra. Aguilar accede.

A Sra. Bértoa declara que non quere facer receso ningún. Despois de ler as anotacións da Sra. Aguilar di que non están de acordo, que fala dun escrito que entrou pola mañá no rexistro e que a eles non lles consta, alude ao informe de secretaria e cualifícao de claro e conciso, sinalando que salvo por unha decisión xudicial, a moción non se pode suspender. Cualifica as notas da Sra. Aguilar como conxeturas que trae unha concelleira que aquí está a representar á Mesa de idade, e que non están en condición de Partido Popular e de Bloque Nacionalista Galego. Diríxese á Sra. Aguilar e dille que ten unhas responsabilidades. A continuación, diríxese á secretaria municipal para que se lle advirta á presidenta desta Mesa de idade as consecuencias xurídicas que se poden derivar da decisión tomada por ela. Pon en dúbida o uso do voto de calidade e a Presidencia da Mesa.

A Sra. Aguilar toma a palabra e reitera que a Mesa de idade ten que comprobar que se manteñen os requisitos esixidos no artigo 197 da LOREX.

A Sra. Bértoa manifesta que a secretaria da Mesa e deste Pleno ten que velar pola legalidade e que ela leu un informe ao inicio desta sesión no que di que a día de hoxe se cumpren os requisitos legais para que a moción saia adiante.

A Sra. Aguilar insiste en que na Mesa de idade, ao ser ela a maior, ten o voto de calidade.

A Sra. Bértoa di que impugna a presidencia da Mesa, que a moción está lida e que existe un informe xurídico que a ampara. Engade que a base do dictatorshipo a Sra. Aguilar quere facer uso dunha competencia que non é para iso, que a Lei é clara...

A Sra. Aguilar interrompe e di que a palabra a ten ela. Que é a presidenta e que a palabra primeira tena ela, e que vai ler o que ten que ler.

A Sra. Bértoa retoma e pide expresamente que conste en acta:

“Que a Sra. Aguilar fala en calidade de concelleira de maior idade, non no nome da Mesa, ten o meu voto en contra”.

A Sra. Aguilar reitera que ten o voto de calidade e que o seu voto é a favor de suspender o pleno. A Sra. Bértoa pide a intervención da secretaria municipal do Concello, e engade que é a persoa que legalmente ten que asesorar a esta corporación. Di que a moción está lida e é o momento de que tomen a palabra o candidato á alcaldía, o candidato saínte e os distintos concelleiros. A Sra. Aguilar di que xa sabe que a moción está lida e o que di a Lei, pero que despois diso “entramos nós” a tomar a palabra, e que a toma de principio a de maior idade. Reitera que a de maior idade é ela e que ten o voto de calidade.

A Sra. Aguilar dá a palabra neste punto á secretaria da Mesa.

A secretaria toma a palabra e explica que o artigo 197 da Lei Orgánica de Réxime Electoral Xeral ao que deu lectura no seu informe, no seu punto 1, apartado e) di, e le textualmente: “la Mesa se limitará a dar lectura a la moción de censura constatando, para poder seguir con su tramitación, que en ese mismo momento se mantienen los requisitos exigidos en los tres párrafos del apartado a)”. A secretaria explica que a Mesa dá lectura á moción e que, posteriormente, se se constata que se seguen cumprindo os requisitos esixidos, se continuará coa tramitación. Afirmar que o feito da lectura da moción de censura non dá, de por si, dereito a continuar, e que do contrario, o artigo estaría redactado en orde inversa.

A Sra. Aguilar volve tomar a palabra. Pide desculpas polo que acaba de pasar e afirma que vai empezar a ler de novo o escrito que ten na man, que di o seguinte:

“Antes de continuar con este pleno quero comunicar, que dentro das funcións da Mesa de Idade está a de comprobar se se cumpren os requisitos esixidos no apartado a) do artigo 197 da LOREX, Lei Orgánica do Réxime Electoral Xeral. Visto o informe da secretaria e á vista do escrito presentado hoxe polo representante do partido político Participación...”

Neste momento a Sra. Aguilar interrompe a lectura e chama á orde. De seguido, continúa coa lectura textual:

“Visto informe da secretaria e á vista do escrito presentado hoxe polo representante do partido político Participación Democrática Directa de Galicia, dirixido á Mesa de idade, entendemos que se modificaron as circunstancias, non dándose os requisitos do artigo 197 da LOREX. Polo tanto, non procede continuar co debate e votación da moción de censura, tal e como ampara a sentenza do Tribunal Supremo de Xustiza de Asturias, Sala do Contencioso nº15 2013, que declara conforme a dereito a decisión da Mesa de idade pola que se acordou non seguir adiante coa tramitación da moción da censura”.

A Sra. Bértoa toma a palabra e di que quere facer constar na acta que é membro da Mesa de idade, co mesmo voto que a presidenta, e que a estas horas a ela non se lle deu traslado de ningún escrito de participación cidadá, e que polo tanto, afirma que o que suscribe “esta señora” é en nome propio, xa que ela non ten constancia. Alude a que a secretaria, cando procedeu a abrir o acto da moción, xa deixou claro que só se podía suspender este pleno mediante un auto dun xulgado, que a día de hoxe e neste momento, ás 12 en punto da mañá, non existe e non está presentado. Afirmar que o que pretende o Bloque Nacionalista Galego e o seu alcalde é perpetuarse no poder usando a ilegalidade. A Sra. Bértoa expresa o seu voto en contra e non subscribe o papel traído pola concelleira no que fai referencia ao escrito presentado por Participación Democrática Directa.

A Sra. Aguilar toma a palabra para deixar claro que o seu voto segue a ser a favor de suspender o pleno, e que o seu voto como presidenta tamén é a favor de pechar a sesión.

A Sra. Bértoa di que o seu voto é en contra e solicita á secretaria do Concello que lle advirta...

A Sra. Aguilar interrompe e di que a palabra a dá ela.

C.I.
F:
P-
150
360
0-G

A Sra. Bértoa continúa a súa intervención e di que quere que a secretaria advirta das consecuencias xurídicas que se poden derivar de pretender a suspensión do pleno, as consecuencias xurídicas que poden derivar para a Sra. Aguilar, utilizando fraude de lei, e as consecuencias dunha presunta prevaricación.

A Sra. Aguilar, ante a petición da palabra dun membro do público asistente, afirma que non se lle concede a palabra a ninguén, e que se suspende o Pleno.

A continuación, a Sra. Aguilar levanta a sesión e declara rematado o acto cando son as 12.44 h, de todo o que eu, como secretaria accidental, dou fe.

En Fene, asinado dixitalmente na data que figura na marxe pola secretaria accidental, Camen López Villar, e polo alcalde Juventino José Trigo Rey.

C.I.
F:
P-
150
360
0-G